

por parte de empresas inscritas neles, polo director provincial da Tesourería Xeral da Seguridade Social ou, se é o caso, polo director da Administración correspondente, conforme a distribución de competencias establecida para eles en materia de aprazamentos.

c) Os solicitantes ós que se lles concedese a bonificación ficarán obrigados, non obstante esta, a presentaren os documentos de cotización na mesma forma e prazos establecidos con carácter xeral, aínda cando non ingresen as cotas.

2. As solicitudes de devolución das cotas xa ingresadas e que sexan obxecto de bonificación, incluídas, se é o caso, as recargas e as custas que se satisfixesen, poderanse presentar xunto coa solicitude de concesión da bonificación e, en todo caso, dentro do prazo establecido no número 1.b) do artigo anterior, debéndose xuntar para tal efecto os documentos acreditativos do seu pagamento.

2.1 Se o que tiver dereito á devolución continuar en alta no réxime da Seguridade Social correspondente, a Tesourería Xeral da Seguridade Social, salvo manifestación expresa en contrario do interesado, poderá aplicar, total ou parcialmente, as cantidades que se devolvan ó pagamento das cotas que deba aboa-lo beneficiario a partir da data de notificación da resolución que recoñeza o dereito á devolución, facéndoo constar expresamente na dita resolución.

2.2 Se o que tiver dereito á devolución for debedor da Seguridade Social por cotas correspondentes a outros períodos, o crédito pola devolución será aplicado ó pagamento de débedas pendentes con aquela na forma que legalmente proceda, sen prexuízo do dereito daquel a solicitar aprazamento extraordinario de tódalas cotas pendentes que, deste modo, non sexan compensadas, nos termos establecidos na orde do 26 de maio de 1999, pola que se desenvolve o Regulamento xeral de recadación dos recursos do sistema da Seguridade Social, aprobado polo Real decreto 1637/1995, do 6 de outubro.

Artigo 3. *Acreditación dos danos causados polo accidente do buque «Prestige».*

Para efectos do disposto no artigo anterior, será suficiente para acredita-los danos sufridos que a empresa, se é o caso, obtivese resolución favorable no expediente de regulación de emprego, no suposto de que fose solicitado como consecuencia dos prexuízos causados polo accidente do buque «Prestige», ou que tanto o empresario afectado como o traballador por conta propia obtivesen a documentación acreditativa das perdas a que se refire o número 1.a) do artigo precedente.

Disposición adicional.

Nas referencias feitas ós traballadores na presente orde entenderanse incluídos tamén os socios traballadores das cooperativas encadrados no réxime xeral e réxime especial da Seguridade Social dos traballadores do mar.

Disposición derradeira.

A presente orde entrará en vigor o día da súa publicación no «Boletín Oficial del Estado».

Madrid, 3 de decembro de 2002.

ZAPLANA HERNÁNDEZ-SORO

Excmo. Sr. Secretario de Estado da Seguridade Social.

MINISTERIO DA PRESIDENCIA

23570 *ORDE PRE/3044/2002, do 3 de decembro, pola que se determinan os termos municipais e os núcleos de poboación onde resultan de aplicación as medidas previstas no Real decreto lei 7/2002, do 22 de novembro, sobre medidas reparadoras en relación co accidente do buque «Prestige».* («BOE» 290, do 4-12-2002.)

O Real decreto lei 7/2002, do 22 de novembro, sobre medidas reparadoras en relación co accidente do buque «Prestige», dispón, no parágrafo terceiro do seu artigo 1, que por orde do vicepresidente primeiro do Goberno e ministro da Presidencia, por proposta do delegado do Goberno en Galicia, se determinará o ámbito territorial de aplicación das medidas por referencia ós termos municipais e núcleos de poboación afectados.

Na súa virtude, por proposta do delegado do Goberno en Galicia, dispoño:

Primeiro.—Para os efectos previstos no Real decreto lei 7/2002, do 22 de novembro, sobre medidas reparadoras en relación co accidente do buque «Prestige», os termos municipais e núcleos de poboación afectados son os que figuran no anexo da presente orde.

Segundo.—Para os efectos das accións reparadoras que levarán a cabo os departamentos ministeriais competentes a que se refire o Real decreto lei 7/2002, do 22 de novembro, entenderanse tamén incluídos aqueles outros nos que para a correcta execución das obras necesarias sexan imprescindibles as actuacións dos devanditos departamentos.

Terceiro.—Esta orde entrará en vigor o mesmo día da publicación no «Boletín Oficial del Estado».

Madrid, 3 de decembro de 2002.

RAJOY BREY

ANEXO

Relación de termos municipais e núcleos de poboación para efectos de determina-lo ámbito de aplicación territorial do Real decreto lei 7/2002, do 22 de novembro

Ares, Arteixo, Bergondo, Betanzos, Cabana de Bergantiños, Cabanas, Camariñas, Cambre, Carballo, Cariño, Carnota, Cedeira, Cee, Corcubión, Corme, Coruña, A, Culleredo, Dumbría, Fene, Ferrol, Fisterra, Laracha, A, Laxe, Malpica de Bergantiños, Mañón, Miño, Mugardos, Muros, Muxía, Narón, Neda, Noia, Oleiros, Ortigueira, Outes, Paderne, Ponteceso, Pontedeume, Porto do Son, Ribeira, Sada, Valdoviño e Vimianzo.

MINISTERIO DE SANIDADE E CONSUMO

23571 *REAL DECRETO 1247/2002, do 3 de decembro, polo que se regula a xestión do Fondo de cohesión sanitaria.* («BOE» 290, do 4-12-2002.)

A Lei 21/2001, do 27 de decembro, pola que se regulan as medidas fiscais e administrativas do novo sistema de financiamento das comunidades autónomas de